

BAHAGIAN XI

┆ KUMPULAN WANG AMANAH PENDIDIKAN KOPERASI

36. Tafsiran.

Dalam Bahagian ini, melainkan jika konteksnya menghendaki makna yang lain-

“Jawatankuasa” ertinya Jawatankuasa yang ditubuhkan di bawah peraturan 38;

“Maktab Kerjasama” ertinya Maktab Kerjasama Malaysia yang ditubuhkan di bawah Akta Maktab Kerjasama (Pemerbadanan) 1968;

Pind. Peraturan
PU(A)591/1996.

“Pengerusi” ertinya Pengerusi Jawatankuasa yang ditubuhkan di bawah peraturan 38;

“tahun kewangan” ertinya tempoh dari hari pertama bulan Januari sehingga hari ke tiga puluh satu bulan Disember tahun yang sama.

37. Akaun Kumpulan Wang Amanah Pendidikan

- (1) Maka hendaklah diwujudkan suatu akaun amanah yang dikenali sebagai Akaun Kumpulan Wang Amanah Pendidikan Koperasi (kemudian daripada ini dipanggil ‘Akaun Amanah’) yang diletakkan di bawah kawalan Menteri.
- (2) Tujuan Akaun Amanah ini adalah seperti berikut:
 - (a) bagi membiayai perbelanjaan berkenaan dengan pengendalian Maktab Kerjasama;
 - (b) bagi membiayai perbelanjaan berkenaan dengan kajian ke atas pergerakan-pergerakan koperasi;
 - (c) bagi membiayai perbelanjaan untuk mengadakan seminar, persidangan atau mesyuarat koperasi, dan penyertaan operator atau mana-mana orang lain yang dicalonkan oleh Jawatankuasa ke seminar, persidangan atau lawatan sambil belajar koperasi di peringkat antarabangsa; atau
 - (d) bagi membiayai perbelanjaan untuk memajukan pendidikan koperasi dalam apa jua bentuk yang difikirkan relevan oleh Jawatankuasa.

38. Jawatankuasa Akaun Amanah

- (1) Bagi maksud menasihati Menteri mengenai pentadbiran Akaun Amanah, suatu Jawatankuasa hendaklah ditubuhkan yang terdiri daripada:
 - (a) Ketua Setiausaha Kementerian yang dipertanggungjawabkan dengan pembangunan koperasi sebagai Pengerusi;
 - (b) Ketua Pengarah Jabatan Pembangunan Koperasi atau alternatifnya Timbalan Ketua Pengarah sebagai Timbalan Pengerusi;

- (c) Pengarah Audit dan Akaun Jabatan Pembangunan Koperasi sebagai Setiausaha;
 - (d) Pengetua Maktab Kerjasama; dan
 - (e) empat orang yang mewakili koperasi-koperasi yang dilantik oleh Menteri.
- (2) Pengarah Audit dan Akaun Jabatan Pembangunan Koperasi hendaklah menyimpan akaun yang teratur dan rekod-rekod lain berkenaan dengan operasi Akaun Amanah itu dan hendaklah menyediakan penyata-penyata akaun bagi setiap tahun kewangan.
 - (3) Suatu mesyuarat Jawatankuasa hendaklah dipanggil oleh Pengerusi sekurang-kurangnya sekali setahun.
 - (4) Tiga orang anggota menjadi suatu kuorum.
 - (5) Tertakluk kepada subperaturan(6), semua keputusan di mesyuarat Jawatankuasa hendaklah diluluskan dengan suatu undi majoriti biasa semua anggota Jawatankuasa yang hadir dan mengundi dengan syarat bahawa jika dalam apa-apa persoalan undi adalah sama banyak, Pengerusi mempunyai undi pemutus.
 - (6) Anggota Jawatankuasa yang disebutkan dalam subperenggan (1)(d) tidak mempunyai hak mengundi di mesyuarat Jawatankuasa.
 - (7) Tertakluk kepada Peraturan-Peraturan ini, Jawatankuasa ini boleh menerima pakai prosedurnya sendiri berhubung dengan mesyuarat Jawatankuasa.

39. Caruman kepada Akaun Amanah.

Pind. Peraturan
PU(A)591/1996.

Caruman kepada Kumpulan Wang Amanah Pendidikan Koperasi adalah apa-apa jumlah wang sebagaimana yang ditentukan oleh Menteri menurut subseksyen 57(2) Akta, dengan syarat bahawa caruman itu bolehlah juga dibuat kepada Tabung Amanah daripada derma-derma.

40. Pembayaran daripada Akaun Amanah

Pind. Peraturan
PU(A)591/1996.

- (1) Semua pembayaran yang dibuat daripada Akaun Amanah hendaklah bagi maksud yang disebutkan dalam subperaturan 37 (2) dan hendaklah dibuat dengan baucar-baucar yang disahkan oleh Ketua Setiausaha Kementerian yang dipertanggungjawabkan dengan pembangunan koperasi.
- (2) Akaun Amanah hendaklah pada setiap masa disimpan secara kredit dan dalam apa hal keadaan sekalipun tidak boleh terlebih keluar.

41. Akaun dan audit Akta 125.

- (1) Akaun Akaun Amanah hendaklah diauditkan tiap-tiap tahun oleh Juruaudit Negara atau oleh seorang juruaudit, yang merupakan juruaudit syarikat yang diluluskan mengikut takrif Akta Syarikat 1965, yang dilantik oleh Jawatankuasa.
- (2) Pada akhir tiap-tiap tahun kewangan, sebaik sahaja akaun-akaun itu diauditkan, Pengerusi hendaklah menyebabkan satu salinan penyata akaun tersebut dikemukakan kepada Menteri bersama dengan satu salinan apa-apa pandangan yang dibuat oleh Ketua Audit Negara atau juruaudit yang lain yang dilantik di bawah perenggan (1) mengenai apa-apa penyata akaun itu.